

Yëkkuö kit Pablo tö Colosas wakpa a Colosenses

Mik Pablo tö yëkkuö i' kit etä ie' tso'ia wötëulewä Roma s'wöto wé a. Wes ì bak ie' tã e' tso' kitule Hechos 28.17-31 e' kî. Pablo wák kè wä Jesús tté buaë pakane Colosas. Wëm eköl kiè Epafra, e' tö Colosas wakpa a ipaka'. E' ukuöki ie' dërö Pablo weblök s'wöto wé a tã ie' tö Pablo a ipaké tö Colosas wakpa shua kabene tso' taië.

Epafra tö ie' a ipaké tö pè' wele tso' s'wöbla'uk Jesús tté wa erè kè dör yësyësë. Pè' ñe'pa tö s'wöbla'weke tö Skëköl kè wä íyi kos yöne Cristo wa. Ñies ie'pa tö icheke tö Jesús kè dör këkëpa taië ese. E' skéie Jesús mik erblökwakpa kawöta tkinuk bua'ie ì kî Israel aleripa tkirke ese kî, es ie'pa tö s'wöbla'weke.

E' kuëki Pablo tö yëkkuö i' kit ñippoie ie'pa ñekkëpa tã Jesús tté buaë tsatkoie. Ie' tö ichè tö Jesús è a se' tsatkërmi. E' kuëki Skëköl tö ie' tkë'ka sulitane ena íyi ulitane tsatã. Ñies ie' ichè tö ì kkacheke pè' esepa tö e' kè dör iie bua' ena e' kè a se' tsatkënik. E' kîie tã ie' tö ikkaché tö wes se' kawöta senuk Skëköl wörki.

Shkë'wè

1 ¹Ye' dör Pablo. Skëköl wák er wa ye' dör Jesucristo ttekölpa tsá, e'pa eköl. Ñies s'yami Timoteo e' tso' ye' tã íe. ²Ye' tso' yëkkuö i' shtök a' dör batse'r serke Colosas e'pa a. A' dör s'yamipa e' tkëulewä darërë Cristo mik. Skëköl dör S'yé as e' er buaë chò ena sene bèrè mù a' a.

Pablo tö wëstela ché Skëköl a ie'pa dalërmik

³Këkraë mik sa' tö ikieke Skëköl a a' kî, etã sa' tö wëstela cheke ie' dör Skëkëpa Jesucristo Yé e' a a' dalërmik. ⁴Sa' tö a' tté ttsé tö a' tso'ia erblök buaë Cristo Jesús mik. Ñies sa' tö ittse tö a' tö s'batse'r malepa kos dalëritseke buaë. E' kuëki sa' tso' wëstela chök ie' a a' dalërmik. ⁵Mik Jesús tté buaë mokjë e' dè' a' ska' kuaë, etã a' tö ittse' tö Skëköl wä ì buaë tso' blëule a' a, e' tso' a' panuk kã jai a. E' wà paneke a' tö kröröë, e' kuëki a' erblöke Cristo mik ena a' ñi dalëritsöke buaë këkraë. ⁶Ttè buaë

e' pakarke tajë ká wa'ñe, e' klö'weke pë' tò tajë. E' tò ie'pa er mane'weke as iser buaë yësyësë. Es ñies ibak a' tã kuaë mik a' tò ittsë' tã iklöö'mi mokì tò Skëköl er buaë ché se' a Cristo batamik. Kuaë dò ì'ñe tã ttë e' wakaneorkear buaë a' shuã. 7Ttë e' paka' Epafras tò a' a, ie' dalër tajë se' éna. Ie' dör Cristo kanè méso wes sa' es. Ie' dör Cristo kanè méso yësyësë a' kimoie. 8Ie' wã a' ttë de sa' ska' tò a' tò sa' dalëritseke tajë Skëköl Wiköl wa.

9E' kuekì mik sa' tò a' ttë ttsë' kuaë, etã sa' utmi S'yé tã a' kì. E' kè olo'yeta' sa' tò dò ikkë tã. Sa' tò ikiear Skëköl a' tò ie' Wiköl tò a' er ñi'ú kabikeitsoie buaë, as ì kiane ie' kì tò a' iwë e' wã ar buaë a' éna. 10E' ane buaë a' éna, e' tã a' serdaë buaë yësyësë wes wépa dör Skëképa Jesús icha, esepa ké senuk es. A' serke es, e' tã ì kos weke a' tò, e' wër buaë ie' wa. Ì buaë kos weraë a' tò tajë wes kal wör tajë buaë es. Ñies wes Skëköl dör, e' wã kì ar michoë a' éna buaë. 11-12Sa' tò ikieke S'yé a' tò ie' tò a' er diché iò, ie' olo tajë, ie' diché tajë, e' wa. Es idir, e' tã a' weirke kos e' dalë'ttsërmi a' a er bua' wa. Ñies ì kos wé S'yé tò a' a, e' kì wëstela cheraë a' tò ie' a' ttsë'ne bua' wa. Ì tso' ie' wã mè se' dör ie' icha batse'rpa e'pa a' ilo bur tajë e' a, e' yök a' yuétkeitö as idö a' ulã a' ñies. 13Ie' tò se' yëttsã ì sulu kos dör wes stui es, ese ulã a' tã se' tsëmiitö wépa blúie ilã dalër iéna e' tso' esepa kíie. 14E' batamik se' tsatkéitö ena se' nuì olo'yéitö se' kì.

Skëköl er buanene se' kì Cristo batamik

15Skëköl kè wërta'wã, erë Cristo wa ie' e' kkeyë' s'ditsö a. Kam íyi ulitane yör, e' yökì Cristo tso'tke. Ie' dör íyi ulitane kos e' tsata. 16Ì kos tso' ká jai a' ena ká i' a, e' yö' Skëköl tò Cristo tã ñita. Ì wërta'wã, ñies ì kè wërta'wã íyi wökirie ena íyi këkölie ena íyi wákíe wã diché tã' ese kos yö' ie' tò Cristo tã ena Cristo kíkoka. 17Kam íyi ulitane yör, e' yökì Cristo tso'tke. Íyi ulitane yöne ie' tã ñita tã ì'ñe tã e' kos kicha a'tser ie' wã. 18Ñies se' dör ie' icha, e'pa wökir ie' dör. Se' dör wes Cristo wák chkà es, etã ie' dör wes s'wökir es. Ie' kótewã, e' shkenekane se' tsáie as ie' dò íyi ulitane tsata. E' kuekì ie' dör se' sene michoë, e' wì kicha bua'ie. 19Wes Skëköl dör, e' kos wënewã Cristo kì, es Skëköl tò ibikeitsbak. 20Ñies ie' tò ibikeitsbak tò íyi ulitane tso' ká jai a' ena ká i' a' ena ká wa'ñe e' dörane ie' ulã a' Cristo batamik. Es ie' tò se' er bua'wéne ie' wák kì Cristo kótewã krus mik, ipé tene tajë se' nuì skéie e' wa.

21Kenet se' bak ì sulu wamblök ena ì sulu bikeitsök, e' kuekì se' bak Skëköl bolökpa siulettã bánet ie' yökì. 22Erë ie' tò se' er buao'ne ie' kì Cristo kótewã se' nuì skéie e' wa as se' döwã ie' wörkì batse'r, kè kì ì sulu tã, kè kì ì nuí tã'. 23Erë se' kawötã e' tkökwa darërëë kekraë se' erblö Cristo mik e' a. Ttë buaë ttsë' a' tò wã paneke a' tò e' kè olo'yar, e' tã iwã döraë a' ulã a. Ttë buaë e' pakane sulitane a' ká wa'ñe ñies ye' tso'ñak ipakök.

Kanè mène Pablo a

²⁴Eré ye' weirke a' dalèrmik, eré ye' ttsè'rke buaë. Cristo weine ie' icha dalèrmik. Ie'pa dör wes ie' chkà es, e' kuëki ie'pa weirke e' dör wes ie' wák tso'ia weinuk es. E' kuëki ye' weirke kos a' dalèrmik, e' dalé'ttsök ye' tso'. Es ye' tso'ñak weinuk Cristo ta. E' tö ye' ttsè'weke buaë. ²⁵Skököl tö kanè mé ye' a Skëképa Jesús icha e'pa kanéuk. Ie' tö ye' patké ie' tté buaë kos e' pakök a' a. ²⁶Se' bak ká iaiaë, e'pa yöki tté buaë e' bak blëulewa, eré i'ñe ta ikkayëne ie' icha batsè'rpa a. ²⁷Ie' tö ibikeitsbak tö tté e' kkacheraë ie'pa a. Tté e' dör buaë shütëë, e' wa ie' er buaë chòmi pè' kos kè dör judiowak esepa a. Tté buaë blëulewa, e' dör tö Cristo tso' se' er a, e' batamik se' dōrañak Skëköl olo ta' tajë, e' ska'. E' wà paneke se' tö kröröë.

²⁸E' kuëki sa' tö Cristo tté pakeke sulitane a. E' wa sa' tö sulitane patteke wöbla'weke kabikeitsè buaë yësyësë wa as sa' tö ie'pa kos mü Skëköl ulà a yöuletke buaë batsulewa Cristo ta nita. ²⁹E' kuëki ye' e' tkéwa darërëë kanëblök diché tajë meke Cristo tö ye' a, e' kos wa.

2 ¹Ye' ki ikiane tö a' wa ijcher tö ye' tso' kanëblök darërëë a' dalèrmik kè shtrirta'wa. Nies ye' tso' kanëblök s'yamipa serke Laodicea e'pa dalèrmik ena s'yamipa malepa kè wa ye' suule, e'pa kos dalèrmik. ²Ye' kanëblöke darërëë ie'pa dalèrmik as ie'pa er diché kí iër buaë, nies as ie'pa kí ñi dalëritsò tajë wes s'yamipa ekka ñi dalëritsò es. E' dör es, e' ta tté buaë blëulewa Skëköl wa kuaë, e' wà kos ardaë ie'pa éna buaë. Tté buaë e' dör Cristo wák. ³Skököl erbikò kos, ena Skëköl wa íyi jcher kos, e' tso' Cristo a blëule wes íyi bua'buwa tuë darërë blësö es. ⁴Ye' tö a' a ichè es as kè yi tö a' kitò'ù tté ttsér buaë, eré kè dör tté moki, ese wa. ⁵Ye' wák kè ku' a' ta, eré e' dör wes ye' wák tso' a' ta es. Ye' wa ijcher tö a' e' tkéwa darërë ñikkëë a' erblò Cristo mik e' a wes wák eköl è es. E' tö ye' ttsè'weke buaë.

Sene pa'ali Cristo a

⁶A' tö Jesucristo klò'wétke e' kékölie, e' kuëki a' senú wes ie' ki ikiane es. ⁷A' e' tkówa darërëë ie' mik wes kal wì kicha klörwa es. A' talanú ie' mik wes kal talar iwí mik es. A' kí erbló ie' mik kekraë wes a' wöblaone es. Wéstela mú kekraë ie' a.

⁸A' tso' erki as kè yi tö a' kitò'ù tté kè wà ta' ese wa. Tté e' ttsér buaë eré iwà kè dör moki, ese dör s'ditsò tté è. Tté ese kos pakane'bitu ká iaiaë, e' dör tté èse tso' ká i' ki ese kè idör Cristo tté. ⁹Cristo dör s'ditsò eré wes Skëköl dör, e' kos wënewa ie' ki. ¹⁰A' batsulewa ie' mik, e' kuëki kè ì skà kianëa a' ki Skëköl wörki. Íyi wökir wa diché ta' kè wërta'wa ese kos tsata ie' dör. E' kuëki kè a' e' kitò'uk tté ku'ki wa.

¹¹A' batsulewa Cristo mik, e' tö a' wák dër suluë yéttsa. Es ie' tö a' wakyué a' er a iwà kkachöie tö a' dör ie' icha. E' dör wes sa' judiowak

wöblar iwëpa tottola kkuölitla ttök tsir es iwà kkachöie tö ie'pa dör Skëköl icha. ¹²A' tö iklö'wë moki tö Cristo shkeo'kane Skëköl tö idiché taië wa. E' kueki mik a' wösune, etä e' dör wes a' wötënewa ena a' shkenekane Cristo ta es. ¹³Kenet ta a' dör ì sulu wamblökwakpa, e' këwö ska' ta a' kè dör Skëköl icha, e' kueki a' dör wes s'duulewa es ie' a. Erë ie' tö a' shkeo'kane, sene moki méitö a' a Cristo ta ñita. Sene sulu e' nuí kos olo'yéitö a' ki. ¹⁴Ie' ttè dalöiëno, e' dalöseo'wa se' tö, e' nuí kos e' ki se' kkatëne. E' dör wes se' nuí kos tso' kitule yëkkuö ki es. Erë ie' tö e' nuí kos patuéttsa Cristo köte'wa e' batamik. E' dör wes ie' tö se' nuí yëkkuö wötë'wa krus mik Cristo ta ñita es. ¹⁵Cristo batamik ie' tö iyi wökir ena iyi wák wa diché ta' kè wërta'wa esepa diché yë'lur. Ie' e' ali'ka ie'pa ki ta ijaëo'itö wes s'klöulewa ñippè shua jaëwë sulitane wörki yi e' aléka iki e' tö es.

Ì tso' ká jai a ese ki a' er múwa

¹⁶E' kueki kè yi kar a' kkatök chke ki di'yé ki. Ñies kawö tkö'weke judiowak tö duas bit ena si' pa'ali bit ena eno diwö bit ekkë, ese kè tkö'wë a' tö e' kè ki yi kar a' kkatök. ¹⁷E' kos me'atbak Skëköl tö ie'pa a iwà kkachöie tö ì weraé Cristo tö mik ide etä. Erë Cristo dë'bak. Es ttè e' kos wà tka. E' kueki ttè dalöiëno këchke ese kè dalöiaria. ¹⁸Wëpa e' ò tö ie'pa dör pë' buaë ser bèrë, esepa tö Skëköl biyöchökwakpa dalöieke. Ñies ie'pa e' chö tö Skëköl tö iyi kkacheke ie'pa a kabsueie. E' wa ie'pa e' ttsökeka taië. Erë ie'pa ttè kè wà ta', e' dör iwákpa kabikeitsö è. Kè a' e' muktsa e' kitö'uk ie'pa esepa ttè wa. ¹⁹Ie'pa esepa kè ku'ia e' batsökwa Cristo dör s'wökir e' mik. Cristo dör wes s'wökir es, etä se' dör wes ie' chka es. Se' wöbla ta', se' kukuöña ta' ena s'yese skà tso' taië kua'ki kua'ki, e' kos iëulewa buaë ñikkëe ta' ikaneblöke buaë ñita. Erë iwökir kè ta' etä s'chka kos e' kè dör iie bua'. Es se' dör Cristo ta' ñies. Se' batsulewa Cristo ta, e' ta' se' kos ser buaë ñita, ñi tsatköke buaë wes s'chka etkè es. E' dör es, e' ta' se' er diché kí iërdaë buaë wes Skëköl ki ikiane es.

²⁰A' duulewabak Cristo ta' ñita ttè èse tso' ká i' a ese kos yöki. A' kè ku'ia idikia. ¿Wes a' tö iutekeia? Ttè ese dör i' es: ²¹Chkè se' kè kar; chke wí kè katar, kè ñar; chke dió kè kar. ²²Ì kos dör ná cheke ttè ese tö, e' erta'wa. Mik ichké one, di'yé one, etä kè ita'ia. Ttè ese kos e' dör ttè dalöiëno me' s'ditsö tö ese è. ²³Kuaë ta' ittèsö tö ttè ese dör moki, wà ta'. Wëpa tso' ttè ese iütök, esepa wër wësua ie'pa tö Skëköl dalöieke buaë mokië. Ie'pa e' ò taië, suësö tö wësua moki idir. Ie'pa wák e' we'iköke taië. E' kueki iwër tö ttè ese dör buaë, erë kè idör es. Ttè ese kè a' ì wamblak s'wák dër suluë éna ese wöklönuk yës.

3 ¹Se' shkeulekane Cristo ta' ñita, e' kueki ì kos tso' ká jai a, e' ki se' er múwa. Eë Cristo tkër Skëköl ulà bua'kka dalöiërta' taië. ²⁻⁴Se' duulewa Cristo ta' ñita. Se' sene mokië e' tso' blëule Skëköl wa Cristo ta

ñita, e' kueki kam ikkayërwa da'aie. Cristo dör sene mokì se' a. Mik ie' dene ká i' a, etá ikkayërdaë sulitane a. Se' kkayërdaë ie' ta ñita olo ta' tajë. E' kueki se' er múwa kekraë ì tso' ká jai a ese ki. Kè se' er mukwa, ì tso' ká i' a, ese ki.

Wépa dör Cristo icha, esepa serke wes ie' ki ikiane es

⁵E' kueki, ì sulu tso' ká ì a tò se' erkiöweke, ese kos olo'yó a' tò. Trè kos, sene sulusi kos, s'er me'rie trè ki, s'erbikò sulusi kos, ese olo'yó a' tò. Ñies íyi kkechè tajë, e' olo'yó a' tò (e' dör wes íyi diököl dalöie skékölie es). ⁶Íyi ekkè kos kueki, wépa kè tò Skéköl ttè iuteta', esepa ki Skéköl kësik ardaë. ⁷A' bak senuk ì sulu kos ese diché dikia. ⁸Erè i'ne ta' kawöta ì sulu skà tso' kos e' olo'yök. Ulune, kësik, ñi wamblò sulu, ese kos olo'yó a' tò. Kè a' ñi chökia suluë. Kè a' tò ttè sulusi chökia. ⁹A' wák dër suluë ena wes e' ser, e' olo'ya' a' tò, e' kueki kè a' kachök ñita. ¹⁰A' wák dër suluë, e' maneonebak sene pa'ali wa. Skéköl tò a' er yuëne pa'ali. Ie' tò a' er mane'wè michoë kekraë as a' er dò wes ie' wák er es. E' uk ie' tso' as a' dò ie' sin'pa chókíe. ¹¹Se' dör Cristo icha, e' shua s'tso' dör judiowak ena s'tso' kè dör judiowak. Se' shua s'tso' datse ká bánet, ñies s'tso' kè yöule tajë esepa. Se' shua s'tso' klöulewa kanè mésoie ese ena s'tso' kè dör es. E' kos kè dè' wes se' a. Cristo batamik se' kos dör ñikkèë. Ie' dör íyi ulitane tsata, ñies ie' tso' se' kos er a.

¹²Skéköl tò a' shukitbak iwák a. A' batseoitò ena a' dalër tajë ie' éna. E' kueki a' ñi saú er sjarë wa, er bua' wa. A' e' ówa diöshet ñi yöki. A' senú bèrè. Íyi kos panú a' tò enaë. ¹³A' ñi dalé'ttsó er bua' wa. Yile tò ì sulu wamblé a' ta, etá e' nuí olo'yó a' tò iki. A' nuí olo'yó a' tò ñi ki wes Skéképa tò a' nuí olo'yé es. ¹⁴Íyi ulitane ekkè tsata, a' ñi dalé'ritsó kekraë, e' dör iwí bua'ie. A' ñi dalé'ritsöke es, e' ta a' serdaë buaë ñita wes wák eköl è es. ¹⁵Mokì Skéköl tò a' klöo'bak senuk bèrè ñita wes wák eköl è es. E' kueki a' e' mú as Cristo tò a' wëttsù senuk bèrè ñita kekraë. Ñies wéstela chó a' tò ie' a kekraë.

¹⁶Cristo ttè bló a' tò a' er a kekraë. A' ñi wöbla'ú iwa, a' ñi pattó iwa erbikè buaë kos meke Skéköl tò a' a, ese wa. Wéstela chó a' tò kekraë Skéköl a' a' er a Salmo wa ena Skéköl ttsé wa ena ttsè meke Wiköl Batse'r tò se' a ese wa. ¹⁷Í kos weke a' tò, ñies ì kos cheke a' tò, e' kos ú ena ichó Skéképa Jesús tò wa. Kekraë wéstela chó a' tò Skéköl dör Slyé e' a Cristo batamik.

Wes se' ké senuk ñita

¹⁸A alakölpá wëm ta', a' wëm ttò dalöió wes Skéképa mik erblökwakpa kawöta iuk es. ¹⁹A wépa, a' alaköl dalé'ritsó, kè kësik blök iki.

²⁰A ala'r, a' yé ena a' mì, e'pa ttò dalöió, e' wër buaë Skéképa wa e' kueki. ²¹A iyépa, kè a' tò a' ala'r uluwarka é ichökle as ie'pa kè eriar tajë shute.

22 A' klöulewā kanè mésoie, a' wökirpa ttö dalöiö këkraë. A' kanëblö buaë ie'pa a këkraë, kè dör tö mik ie'pa tö a' suëke e' è tã ie'pa wökatöie. E' skéie a' kanëblö ie'pa a er mokí wa, Skëképa dalöieke a' tö e' kuëkí. 23-24 Ñermata a' dör Cristo kanè mésopa, ie' dör a' wökir mokí. A' kanëblöke buaë ká i' a a' wökirpa a, e' tã e' ské meraë Cristo tö a' aishkuö ta. E' kuëkí ì kos weke a' tö e' ú kanëë wes a' tso' iuk Skëképa wák a es, kè dör wes s'ditsö a iwè es. 25 Erë Skëköl a sulitane dör ñies ème, e' kuëkí wépa tö ì sulu wambleke, ese nú kí ie' tö ie'pa we'ikeraë aishkuö ta.

4 1 A' wépa wā kanè mésopa tso', esepa tö ie'pa saú er bua' wa yësyësë. A' éna ianú tö a' wā wökir tso' ñies, e' dör Skëképa tso' ká jaí a e'.

Se' e' chò ttök Skëköl ta

2 A' e' chò ttök Skëköl ta këkraë, kè ilo'yar. Mik a' ttöke ie' ta, etã e' è wà bikeitsó, ñies wëstela chò ie' a. 3 Ye' tso' wötëule íe s'wöto wé a Cristo tté buaë blëulewā kuaë, e' paké kuëkí. E' kuëkí ikió Skëköl a tö ie' tö sa' kímú Cristo tté kí pakök buaë ká wa'ñe as kè ì tö sa' wöklö'ù. 4 Ikió Skëköl a tö ye' mú ipaké buaë yësyësë wes ye' kawötã ipakök es as sulitane éna iwã ar buaë.

5 Mik a' tso' pè' kè dör Jesús mik erblökwakpa, esepa ta, etã a' senú buaë wes Skëköl ala'r ké senuk es. Kè a' kawö chöuk é. Kawö yóttã kapakök ie'pa ta. Cristo tté buaë pakó ie'pa a. 6 A' ké ttök ie'pa ta tté bua' buaë wa as ie'pa tö a' ttö ttsò er bua' wa. A' tso' erkí ì kos chakeke ie'pa tö a' a eköl eköl, e' iütök yësyësë.

Pablo e' chéat

7 Tíquico tö ye' biyó cheraë a' a. Ie' dör s'yami dalër tajë sa' éna ese. Ie' dör ye' kímukwak yësyësë ese. Ie' dör Skëképa Jesucristo kanè méso ye' ta. 8 E' kuëkí ye' tso' ie' patkök a' ska' as ie' tö a' a ichò tö is sa' tso', ñies as a' er kuùitö. 9 Ie' tã Onésimo mi'ke ñies. Ie' dalër sa' éna, ie' dör s'yami e' tkëulewā darërë ese. Ie' datse a' ká a. Ie'pa bül tö a' a icheraë tö is sa' kawö tköke.

10 Aristarco tso' wötëule ye' ta s'wöto wé a, e' tö a' shké'wémi. Ñies Marcos dör Bernabé duö', e' tö a' shké'wémi. A' a iyënetke tö ie' de a' pakök, etã ikiówā buaë. 11 Jesús kiè ñies Justo, e' tö a' shké'wémi. Wépa tso' ye' ta ì blúie Skëköl tso' e' kanè a e'pa shuã ie'pa mañal è dör judiowak. Ye' er pablérakitö tajë. 12 Epafra dör a' wakpa eköl, e' tö a' shké'wémi. Ie' dör Cristo Jesús kanè méso. Këkraë ie' kköchöke Skëköl a a' dalërmik tö a' mú e' tkéwā darërëë Cristo tté a kè ibikeitsë bötböt ena e' meulettsã da'gie ì kiane Skëköl kí ese wöie. 13 Ye' wák tö ie' cheke mokí tö ie' kanëblöke darërëë a' dalërmik, ñies Jesús mik erblökwakpa tso'

Laodicea ena Hierápolis, e'pa dalërmik. ¹⁴Lucas tö a' shkë'wëmi. Ie' dör s'kapeyökwak dalër taië se' éna. Ñies Demas tö a' shkë'wëmi.

¹⁵S'yamipa serke Laodicea, e'pa shkë'ú sa' a. Ñies Ninfa ena Skëképa icha erule ñi dapa'úke ie' u a, e'pa shkë'ú sa' a. ¹⁶Yëkkuö i' aritsé one a' tö sulitane kukua, e' ukuökí tã ipatkómi a' tö Skëképa icha erule ñi dapa'úke Laodicea, e'pa a as ie'pa tö iaritsò ñies. Ñies yëkkuö patkë' ye' tö Laodicea wakpa a, e' saú mik ide a' ska' etã. ¹⁷Ichó Arquipo a tö Skëképa Jesucristo kanè mène ie' a wè, e' wà ú ie' tö seraã buaë.

¹⁸Ñies ye' dör Pablo, e' tö shkëne i' shtë ye' wák ulà wa. Kè a' éna ichökwa tö ye' tso' wötëule s'wöto wé a. As Skëköl er buaë chò a' a.